

BAB V

KACINDEKAN JEUNG SARAN

5.1 Kacindekan

Basa Sunda dialék Parung Panjang anu dipaké ku siswa SMP/SMA jumlahna aya 113 kecap tina 577 kecap istilah-istilah anu sok dipaké dina kahirupan sapopoé. Tina 113 kecap dialék anu dipaké ku siswa, ngawengku 74 (65,4%) kecap salancar, jeung 39 (35,3%) kecap rékaan. Tina 39 kecap anu kaasup kana kecap rékaan, kapanggih aya 9 (8%) kecap rundayan, 13 (11,5%) kecap rajékan, jeung aya 17 (15%) kecap kantétan.

Tina 113 kecap dialék anu kapanggih, papasinganna nya éta istilah pancakaki aya 6 (5,3%), kecap gaganti sesebutan aya 2 (1,7%), ngaran babagian awak aya 6 (5,3%), istilah imah jeung babagianna aya 5 (4,4%), ngaran pakakas aya 9 (7,9%), ngaran kadaharan jeung inuman aya 14 (12,3%), ngaran panyakit aya 7 (6,1%), kecap pagawéan aya 4 (3,5%), pakéan aya 5 (4,4%), ngaran kaulinan barudak aya 9 (7,9%), ngaran tutuwuhan jeung bungbuahan aya 16 (14,1%), ngaran sasatoan aya 12 (10,6%), istilah kaayaan alam jeung usum aya 3 (2,6%), istilah budi parangi aya 3 (2,6%), kecap pagawéan aya 4 (3,5%), sarta kecap pananya, panyambung, panambah, jeung panganteb jumlahna aya 11 (9,7%).

Tina hasil data anu dianalisis unsure morfén nu jadi pangwangan, aya 74 (65,4%) kecap dialék anu kaasup kana kecap salancar anu diwangun ku 4 pola engang, pola ka-1 mangrupa pola saengang anu diwangun ku KV(K), pola ka-2 mangrupa pola dwi engang anu diwangun ku dua engang nya éta (K)V-(K)V(K), pola ka-3 mangrupa pola tri engang anu diwangun ku tilu engang nya éta KV-KV-(K)VK, jeung pola ka-4 mangrupa pola catur engang anu diwangun ku opat engang nya éta KV-KV-(K)V-KVK.

Salian ti kecap salancar, kecap dialék Parung Panjang ogé diwangun ku kecap rékaan. Jumlah kecap rékaan anu kapanggih jumlahna aya 39 (35,3%) kecap. Tina 39 kecap rékaan, kapanggih aya 9 (8%) kecap anu kaasup kana kecap rundayan, 13 (11,4%) anu kaasup kana kecap rajékan, jeung aya 17 (15%) kecap anu kaasup kana kecap kantétan.

Wangun kecap rundayan dialék Parung Panjang bisa katitén tina prosés ngararangkénanna (hareup, tukang, barung, jeung gabungan). Tina hasil analisis anu geus didadarkeun, kapanggih aya1 kecap anu kaasup kana rarangkén hareup (*Ku-*), aya 2 kecap anu kaasup kana rarangkén hareup (*N-*), aya 1 kecap anu kaasup rarangkén hareup (*Pa-*), aya 1 kecap anu kaasup kana rarangkén hareup (*di-*), aya 1 kecap anu kaasup kana rarangkén hareup (*ka-*), aya 2 kecap anu kaasup kana rarangkén tukang (*-an*), jeung aya 1 kecap anu kaasup kana rarangkén gabungan (*ka-an*).

Salian ti kecap rundayan, ogé kapanggih aya 3 wangun kecap rajékan, nya éta 6 kecap anu kaasup kana rajékan dwipurwa, 1 kecap anu kaasup kana rajékan dwimurni, jeung 5 kecap anu kaasup kana rajékan dirarangkénan. Kecap dialék Parung Panjang anu kaasup kana Kecap Kantétan diwangun ku 4 pola, nya éta pola ka-1 kecap kantétan anu diwangun ku kecap barang jeung kecap barang, pola ka-2 kecap kantétan anu diwangun ku kecap barang jeung kecap sifat, pola ka-3 kecap kantétan anu diwangun ku kecap barang jeung kecap pagawéan, pola ka-4 kecap kantétan anu diwangun ku kecap pagawéan jeung kecap barang.

Peta sebaran kecap basa Sunda dialék Parung Panjang nu dipaké ku siswa SMP/SMA di Kacamatan Parung Panjang digambarkeun hiji-hiji, kecap anu sarua dibéré simbol anu sarua, sedengkeun kecap anu bédá dibéré simbol anu bédá. Dumasar sebaran peta wilayah kecapna, tina sakecap basa lulugu anu diujikeun bisa kapanggih dialék anu bédá antara sakola nu hiji jeung sakola nu séjénna.

5.2 Saran

Sanggeus diayakeunna panalungtikan ngeunaan basa Sunda dialék Parung Panjang nu dipaké ku siswa SMP/SMA di Kacamatan Parung Panjang, aya sababaraha hal anu hayang ditepikeun minangka saran.

- 1) Perlu diayakeun panalungtikan séjén anu nalungtik basa Sunda dialék Parung Panjang Kabupatén Bogor, anu leuwih jembar dina papasingan istilahna, sangkan panalungtikanna bisa leuwih akurat, sabab loba kecap dialék Parung Panjang anu can kapaluruh.
- 2) Ieu panalungtikan henteu nalungtik sakabéh sakola anu aya di kacamatan Parung Panjang Kabupatén Bogor, ku kituna dipiharep aya panalungtikan

séjén anu nyokot sampel leuwih loba sakolana atawa sakabéh sakola nu aya di Kacamatan Parung Panjang.

- 3) Dipiharep siswa-siswi di sakola miboga kareueus dina maké basa Sunda dialékna deui. Salian ti siswa, dipiharep guru ogé bisa ngilu biung dina ngamumulé, jeung ngawanohkeun basa Sunda dialék Parung Panjang.